

दिनांक : 14.06.2026

समय : 18.45 बजे

आकाशवाणी जयपुर-अजमेर  
प्रादेशिक समाचार

- प्रधानमंत्री नरेन्द्र मोदी भारत-फ्रांस साझेदारी ने आपसी विश्वास, साझा मूल्य अर भविष्य खातर समान दृष्टिकोण माथे आधारित बतायो ।
- केन्द्र री नरेन्द्र मोदी सरकार रा बारह बरस पूरा होबा रे मौके राज्यभर मांय जागरुकता प्रदर्शनियां राख्थी गई- केन्द्रीय मंत्री अर्जुनराम मेघवाल सरकार री उपलब्धियां गिनाई ।
- राज्य मांय चाल रिया शहरी अर ग्रामीण सेवा शिविरां मांय लोगां री समस्यावां रो मौका माथे समाधान व्हे रियो है ।

अर

- प्रदेश मांय प्री-मॉनसून गतिविधियां तेज-पूर्वी अर उत्तरी जिलां रे सागे केई ठौड़ां माथे आंधी अर बारिश ।

000

प्रधानमंत्री नरेन्द्र मोदी अर फ्रांस रा राष्ट्रपति इमैनुएल मैक्रों आज नीस मांय भारत इनोवेट्स कार्यक्रम रो भेळा तौर ऊं उद्घाटन करयो । भारत-फ्रांस नवाचार बरस मांय राख्या इण कार्यक्रम मांय दूजा देशां रा शीर्ष नवाचार स्टार्टअप अर उद्यम पूंजीदाता भी भेळा व्हा । इण मौके प्रधानमंत्री नरेन्द्र मोदी भारत अर फ्रांस रा मजबूत संबंधां रो जिकर करयो । वणा कया के नवाचार, प्रौद्योगिकी अर भारत रा नौजवानां री आकांक्षावां देश रा विकास ने गति अर भविष्य ने आकार दे री है ।

.....  
फ्रांस रा राष्ट्रपति इमैनुएल मैक्रों भारत रे बारे इण विशेष पहल री मेजबानी ने फ्रांस खातर सम्मान रो विषय बतायो । वणा कया के दुनिया, भारत ने अपार प्रतिभावां सूं सम्पन्न, नवाचार अर प्रौद्योगिकी रा हलका मांय एक क्रांतिकारी शक्ति रा रूप मांय देख री है । राष्ट्रपति मैक्रों आजादी रे पछे भारत रा सब ऊं लम्बा टेम तांई निर्वाचित प्रधानमंत्री बणबा माथे भी श्री नरेन्द्र मोदी ने बधाई दी । दोन्यू नेतावां रे बीच शिष्टमण्डल स्तर री वार्ता जारी है । दोन्यू पक्षां रे बीच विशेष वैश्विक, सामरिक भागीदारी बढाबा माथे खातर तौर ऊं चर्चा व्हे री है, जिण मांय रक्षा, प्रौद्योगिकी अर व्यापार शामिल है ।

000

केन्द्र री नरेन्द्र मोदी सरकार रा बारह बरस पूरा होबा रे मौके आं दिनां राज्यभर मांय जागरुकता प्रदर्शनियां अर प्रचार गतिविधियां राखी जा री है । **12 साल विश्वास के, विकास के, जनकल्याण के** विषय माथे राखी प्रदर्शनी मांय सरकार री उपलब्धियां अर जनकल्याणकारी योजनावां रो प्रचार-प्रसार करयो जा रियो है । सिरोही जिला मुख्यालय माथे चाल री प्रदर्शनी रो आज ग्रामीण विकास अर पंचायतीराज राज्य मंत्री ओटाराम देवासी जायजो लीनो । इण दौरान स्थानीय सांसद लुम्बाराम चौधरी भी मौजूद रिया । अलवर जिला मुख्यालय माथे लगाई ज्यी प्रदर्शनी रो प्रभारी मंत्री डॉ. किरोडीलाल मीणा जायजो लीनो । ई मौके प्रभारी मंत्री कया के राज्य सरकार री भ्रष्टाचार रे खिलाफ जीरो टॉलरेंस नीति रे चालता किंणी दोषी ने बख्ख्यो नी जावेला । खबरनवीसां ऊं बातचीत मांय वणा कयो के काश्तकारां ने नकली खाद-बीज बेचबा वाळा माथे कड़ी कार्रवाई जारी रेवेला ।

.....

इण कड़ी मांय विकसित भारत संकल्प सम्मेलण रे तैत आज बीकानेर मांय भाजपा री कानी ऊं प्रबुद्धजन सम्मेलन राख्यो गयो। सम्मेलन मांय केंद्रीय कानून मंत्री अर्जुनराम मेघवाल कह्या के प्रधानमंत्री नरेंद्र मोदी री अगुवाई मांय लारला बारह बरसां मांय भारत विकास, सुशासन, राष्ट्रीय सुरक्षा, सामाजिक न्याय अर जनकल्याण हलकां मांय घणी तरक्की करी है। वे कया के मोदी सरकार **सबका साथ, सबका विकास, सबका विश्वास और सबका प्रयास** रा मंत्र रे सागे काम कर्यो है।

000

आयुष मंत्रालय आज यूट्यूब माथे राख्या एक लाइव योग सत्र रे मार्फत नयो गिनीज वर्ल्ड रिकॉर्ड बणायो। इण ऑनलाइन योग कार्यक्रम मांय चार लाख 35 हजार सूं बत्ता लोग भाग लीना। आयुष मंत्री प्रतापराव जाधव कया के ओ उपलब्धि दुनिया भर मांय योग री बढ़ती लोकप्रियता ने दरसावे है। वणा लोगां ऊं योग ने आपरा रोजमर्रा रा जीवन रो हिस्सो बणाबा री अरज करी। अंतरराष्ट्रीय योग दिवस रो खास कार्यक्रम 21 जून ने कोलकाता मांय व्हेला।

000

राज्य सरकार प्रदेश मांय राख्या जा रिया ग्रामीण सेवा शिविरां मांय संभागीय आयुक्त अर जिला कलेक्टरां ने तहसीलदार अर नायब तहसीलदारां री पोस्टिंग रो अधिकार दियो है। 12 जून सूं सरू व्ह्या इण शिविरां ने असरदार अर चोखी तरीका ऊं करबा खातर राजस्व महकमो प्रशासनिक शक्तियां बांट दीनो है। जनता सूं जुड़्या कामां ने टेम माथे पूरो करबा अर योजनावां रो फायदो हर एक जणा तांई पूगाबा खातर सरकार यो कदम उठायो है। अबे संभागीय आयुक्त अर जिला कलेक्टर आपरा अधिकार खेतर मांय **“नॉन-फील्ड”** मांय काम कर रह्या तहसीलदार अर नायब तहसीलदारां ने तहसीलां या उप-तहसीलां मांय खाली पद माथे नियुक्ति कर सकेला। इण रे इतर भू-राजस्व अधिनियम रे तैत आबादी विस्तार खातर जमीं आरक्षित कर्या जाबा री जिला कलेक्टर री शक्तियां भी शिविर प्रभारियां ने दी गई है। खातेदारां रा जमीं सूं जुड़्या मामला अर अभिलेखां मांय गलतियां ने ठीक करबा रा प्रकरण सूं जुड़ी शक्तियां भी प्रभारियां ने सूपी गई है। तहसीलदार अर नायब तहसीलदारां ने भी भूमि बंटवारा अर पंचायतां रा सीमा ज्ञान री शक्तियां भी हस्तांतरित करी गई है। सरकार भूमि आवंटन खातर आवेदन री उद्घोषणा री मियाद भी घटा र 7 दिन कर दी है।

000

राज्य मांय नमक उत्पादन ने बढ़ावो देबा खातर नियमां मांय फेरबदल कर्यो गयो है। नया नियमां रे मुजब अबे नमक उद्योग खातर भूखंड आवंटन ई-ऑक्शन रे मार्फत कर्या जावेला। पहली आ प्रक्रिया लॉटरी आधारित ही। जिण जिलां मांय नमक उत्पादन खातर लवणीय भूमि मुहैया है, उण मांय अबे सर्वे सीमांकन अर भू-खण्डां रा मापन रे पाछे ही आवंटन री कार्यवाही करी जावेला। पैली रा नियमां मांय लीज खत्म होबा रे चार बरस रे पछे नवीनीकरण करबा रो कोई प्रावधान नी होबा सूं राज्य री करीब 300 नमक उत्पादक इकाइयां लीज नवीनीकरण नी हो, जिण बजह सूं नमक उत्पादक घणा परेशान हा। राज्य सरकार कानी ऊं इण भांत री इकाइयां ने 6 महीना री एकमुश्त छूट देर नमक उत्पादकां ने राहत दी गई है। सरकार रा इण फैसला ऊं नमक हलका मांय निवेश बढ़ेला अर रूजगार रा नया मौका बणेला।

000

पाली मांय वरिष्ठ नागरिकां खातर बणाया गया डे-केयर सेंटर रो आज सामाजिक न्याय अर अधिकारिता मंत्री अविनाश गहलोत उद्घाटन कर्या। इण सेंटर मांय बुजुर्गा खातर केई गतिविधियां चलायी जा री है। इण मौके श्री गहलोत कया के राज्य सरकार ठावां नागरिकां रा कल्याण खातर समर्पित है।

000

सलूमबर मांय काश्तकारां ने जैविक अर प्राकृतिक खेती री कानी ऊं जागरूक करबा खातर कार्यशाला राखी गई। जावर माइंस रा सामुदायिक भवन मांय राखी ज्यी इण कार्यशाला मांय सांसद डॉ. मन्नालाल रावत अर विधायक शांति देवी भाग लीना। इण मौके काश्तकारां ने रासायनिक खाद रे बिना खेती अर नवाचार करबा ने प्रेरित कर्यो गयो।

000

प्रदेश मांय प्री-मॉनसून रो सिलसिलो तेज व्हे गयो है। पश्चिमी विक्षोभ रा असर ऊं लारला चौबीस घंटा मांय राज्य रा पूर्वी अर पश्चिमी हलका मांय कुछेक ठौड़ां माथे बादल गरजबा रे साथे कठे-कठे छितरायो

मेह बरस्यो । राज्य रा पूर्वी अर उत्तरी हलका रे सागे ही शेखावाटी खेतर रा जिलां मांय आज केई ठौड़ां माथे आंधी-बारिश रो दौर चाल रह्यो है । राजधानी जयपुर मांय दोपहर पछे मौसम पलटबा सूं केई ठौड़ां माथे हल्को मेह बरसबा सूं दिन अर रात तापमान मांय गिरावट आई है । मौसम महकमो आज प्रदेश रा 9 जिला खातर ऑरेंज अलर्ट जारी करयो है । वठी ने जैसलमेर रे अलावा सगळा जिला मांय येलो अलर्ट ऐलान कर्यो गयो है । अठी ने मौसम सुहावणो व्हेबा सूं गर्मियां री छुट्टियां रे चालता प्रदेश री सैर-सपाटा री ठौड़ां माथे रौनक देखी जा री है । राजधानी जयपुर मांय लारला कुछेक दिनां ऊं घरेलू सैलाणियां री तादाद बढी है । पर्वतीय पर्यटक ठौड़ आबूराज मांय आं दिनां राजस्थान रे सागे ही पड़ौसी राज्य गुजरात सूं भी बड़ी संख्या मांय सैलानी पूग रिया है ।

-----  
000

आईसीसी महिला टी-20 क्रिकेट विश्व कप मांय आज भारत आपरा पहला मैच मांय पाकिस्तान रे सागे खेलेला । गुप-ए रो ओ मैच बर्मिंघम रा एजबेस्टन मांय भारतीय टेम रे मुजब सिज्यां सात बज्यां सरू व्हेला । महिला टी-20 अंतरराष्ट्रीय मैचां मांय भारत हाल ताई पाकिस्तान ने 16 मांय सूं 13 मुकाबलां मांय हरा चुक्यो है ।

000

विश्व रक्तदाता दिवस माथे आज प्रदेशभर मांय केई गतिविधियां राख्यी गई । सुरक्षित रक्त रा महत्व रा बारा मांय जागरुकता ल्याबा अर स्वैच्छिक रक्तदान खातर प्रेरित करबा रा लगस सूं न्यारा न्यारा संगठनां अर संस्थानां री ओर ऊं कार्यक्रम राख्या गया । अजमेर रा जवाहर लाल नेहरू सफाखाना मांय सम्मान समारोह राख्यो गयो । रक्तदान, जीवनदान विषय माथे वक्ता आपरा विचार राख्या । भीलवाड़ा मांय रेडक्रॉस सोसायटी री कानी ऊं राख्या कार्यक्रम मांय जिला कलेक्टर जसमीत सिंह संधु रक्तदातावां रो सम्मान कर्यो ।

000